



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

45. Kalenderwoche – ab 07. November 2010

Zwee Bremjähren

Wennde sowas wie e Ginsdlor bisd un off dor Biehne schdehn dusd un dann nisch selbsdgriddisch sein dusd, bisde irschendwie off de Bresse odor annre Griddiggor angewiesn, die dir dann sachn dun, obs guhd is, was de machn dusd, odor obs bloß Bubs is.

Mir haddn nu in dor ledzdn Zeid in dor Gabaredd-Gisde gleich zwee neue Brogramme. Eema de "Weibordrubbe Elfn-Been" mid "Je oller, je dollor" un nu isch un dor Herr Mai mid "Schmärzliche Gundsfehlor". Zwee Brähmjähren sozusachn - un keenor war da! Also, kee Griddiggor war da un nisch eenor von dor Bresse!

Sowas duds in annre Schdädte nisch gähm. Also, wenna in annre Schdädte ieborhaubd e seßhafdes Gabaredd gähm dud! Dasses in eenor Schdadt gleich zweeje gähm dud, is ja sähr seldn - ma abgesähnd jedzde von Leibzisch. Un wenn das einheimische Gabaredd was Neues bring dud, dann sinn die von dor einheimischn Bresse da und dun driebor berischdn - vorhähr un hinnerhähr ! Sogahr in Leibzisch, wose se seggse ham! In Gemnidz is das nisch so. In Gemnidz sin die von dor Bresse mid die Gommedy-Schdars un Gabareddisdn beschäfdischd, die im Dudzend in dor Schdadthalle offschlachn un absahn dun. Nirschendwo wern de Leide so mid Gommedy un Gabaredd ieborfluhded wie in Gemnidz!

Ja, mir hamm nisch bloß de greeßde Einkoofsfläsche bro Gobb dor Bevelgorung, mir ham ooch de greeßde Schbaßdischde bro Gobb. Ob das nu immor luschdisch un zum Lachn is, weeiß isch nisch. Mansche dun von wachsendor Vorbleedung redn.

Jednfalls sinn bei uns die zwee Bremjähren iebor de Rambe gegang, ohne dass mir von Bresse beläsdichd wordn sinn. Einheimische Gulduhr dud fiehr die nisch als Gulduhr geldn. Off dor Gulduhrseide dud ehor was iebor de Sindy aus Marzahn schdehn odor Olm odor volgsdiehmische Musig odor währ weeb was! Is ja ooch wischdich, dass de Region erfahrn dud, dass die da gewähsn sin! Dass mor erfahrn dud, dass mor ma nach Gemnidz in de Gabaredd-Gisde gehn kennde... - nee, mir sinn jedze iebor dreizn Jahre in Gemnidz, abor aus dor Bresse dud das keenor wissn! Nu schdehn mir jednfalls widdor ganz alleene da un frachn uns vorzweifld, ob mir das, was mir machn dun, mid gudm Gewissn weidormachn kenn. Wobei - die Frache is villeischd bleede. Eischendlich kannsde ja heidzudaache sowieso jedn Scheiß machn, haubdsache es is dähmlisch genuch. So Ard Gulduhrwäschdor, also welsche, die offbassn dun, was dähn Leidn so servierd wern dud... un ob das ooch im Sinne von dor humannisdichn Gulduhr is... solsche Gulduhrwäschdor duds ja sobiso nisch mähr gähm - solsche Griddiggor! Nee, wenn in eenor Gulduhr alles erlaubd is, dann duds ja gahr keene Gulduhr mähr gähm! Un dann brauch ooch keenor mähr droff offbassn!

Nee, da dud uns werglich bloß iebrisch bleim - mir missn off uns selbor offbassn, damid mir nisch allzuviel Scheiß machn dun. Un mir wern uns ooch weidorhin Miede gähm! Vorschbrochn!

Eduard Sachsenmeyer